

唐文拾遺卷之二十四

榮祿大夫三品頂戴前分巡廣東高廉道加四級臣陸心源輯

崔儒

儒德宗朝人

嚴先生釣臺記

易象以天地交乃泰夫交者氣同道濟之謂也同則無變濟則兼利雖君臣之殊位品類之異數其義一焉嚴子陵與漢世祖可爲天地之交矣嚴君處道立寂超往返獨以輔弼爲縲繼以寵榮爲穢汚絕世高蹈歸乎舊山斯達人之常域也世祖不以祿位抑之

不以褻崇加之其來也同寢共體其去也鴻飛雲逝
示君臣之與際存天地之易簡道泰氣同變之至也
後之人以常情所不及異而疏之飾而詞之是彫之
至樸逕於夷途矣況今之變者權利傾弛百無一全
知人知己事皆昧絕邈想遺塵慨然興悲觀其兩峯
相嶽羣木茂植上有平田足以力耕下臨清流可以
垂釣乃嘉遁之勝境舍此何居則呂尚父不應餌魚
任公子未必釣鼈世人名之耳釣臺之名亦猶是乎
行舟輟颿因有斯述將以誠夫僞交與貪位者豈直
紀事而已哉興元元年夏四月景辰建

宋再興

再興建中時人田悅叛僞封長豐縣丞

故雲麾將軍守左金吾衛大將軍試鴻臚卿上

柱國宋公墓誌銘

并序

府君宋公諱儼西河郡人也宿著天雅英雄越風當
才用武文烈古今料敵先鋒決勝千里衝突兵象煞
氣橫屍建中二年七月出薊城奉恩命元戎宋公我
神將府君宋公親領甲兵收掌恆定圍深州尅伏其
年十一月破恆定節度張惟岳十萬餘人積屍遍野
收聚屍骸埋築丘塚何期國家負德不與功勳反禍

燕師授太原河東節度口口惡奏先領朔方兵甲隴
右道李懷光領秦兵及殿前兵馬同廿餘萬屯營魏
博御河西側我幽州節度并以恆冀兵馬建中三年
三月離深州至魏貝相去秦兵十里屯營再鼓烈陣
弓矢相交六月卅日被馬遂兵馬廿餘萬積屍遍野
血流御河我府君名將節操衝口交鋒決命於先不
顧殘軀名播後世何期運命緣終逝水長流永絕卒
於此日陣也享年春秋卅有八嗚呼痛哉嗚矣哲仁
愁雲位垂悲風慘色爲此忠効冀國王封子長豐縣
丞報其名父夫人公孫氏孀居叵歲撫育家業禮有

曹家之誠孝絕孟母之葬齊眉雙明琴瑟同韻何期
先窆於前卜噬良日建中四年歲次癸亥四月丁未
朔廿七日癸酉葬於幽昌平縣東北十里武安鄉墳
開數仞後擁月口堆阜千重橫瞻玉按右帶房山之
秀左臨滄海之涯宜其備矣鐫石千古萬世銘曰

名將賢良貞幹負霜榮枯萬世惟德洋洋

石刻

張周

周建中朝官給事郎行河南府洛陽縣丞翰林學士
賜緋

大唐涇王故妃韋氏墓誌銘序

夫必有婦其尙矣先務德次求容功兼而有之方謂
盡善不爾則不足以侍執巾櫛宜其室家故詩稱好
逑傳著嘉偶非必獲是孰媿名王妃姓韋氏蓋京兆
長安人祖湜皇朝中散大夫賴王府司馬贈光祿卿
父昭訓皇朝中散大夫太子僕贈衛尉卿皆公望自
遠吏才兼優來以何暮見歌去以不留興詠妃卽淮
陽府君之第四女也自漢及今門爲望族男不卿士
女則嬪嬙蟬冕魚軒與時閒出騰光簡謀昭晰紛綸
妃蕙以爲心馨甘如蔗詞懿而定服純而衷位則干
乘小君行則一人猶母雖貴無壽命也如何嗚呼享

年四十八以建中二年十二月己酉薨於寢以三年
二月庚申葬於原禮也存不育男孕女沒無主祀執
喪有足悲夫銘曰

調右著姓海內名家氣與蘭馥顏如舜華宜乎作嬪
于王之室如何不淑中路先畢松楸交植塗芻共來
一晝朝露千秋夜臺目覩原野心傷埋沒日旣光沉
人亦薰歇中無可欲焉慮發掘但悵長辭獨歸城闕
石刻

高郢。

全唐文四百四十九有傳

勒停鼓吹四嚴奏

六典凡駕行幸有夜警晨嚴之制今署司所申是并
警亦呼爲嚴相承已久樂官不能辨伏奉開元禮皇
帝時饗太廟及上辛祈穀于圜邱皆于正殿致齋第
三日欲赴行宮前七刻五刻二刻有三嚴之儀並無
五更三點以前四嚴及駕至橋一嚴之文伏請勒停
准禮依時刻三嚴又其時所設宮懸懸而不作鑾駕
進發不鳴鼓吹至祀日太廟饗禮畢鑾駕欲發及南
郊行事鑾駕還宮之時然後各有三嚴皇帝既還大
次停一刻須槌一鼓爲一嚴三刻須槌二鼓爲再嚴

五刻須槌三鼓爲三嚴往例儀注皆准此禮鼓吹署所申並與禮文不同又都未知准禮是行事畢有三嚴之制伏以立禮之旨務於精誠鑿駕出宮在祀前之日猶懸而不作不鳴鼓吹况祠所齋潔明發行事此夜誠合清淨不應鉦鼓誼譁其鼓吹署所申四嚴及臨上壇一嚴伏請勒停其行事畢後南郊迴請准禮依時刻三嚴太廟宿其後不嚴及南郊迴於明德門裏鼓引駕至丹鳳門

唐會要卷十八

邵說

全唐文四百五十二有傳

唐故開府儀同三司兼左羽林軍大將軍知軍
事文安郡王贈工部尙書清河張公神道碑

銘 并序

大厯乙卯歲夏四月有星犯於北落洎秋九月癸巳
大將軍維岳薨于位冕旒悼惜贈工部尙書申命有
司備禮以其年十月乙酉葬於高陵縣奉政之先塋
公髻髦敏異弱冠宏達風儀朗徹望之嶷然業于武
專于學精于戰陳口于兵鈐萬人之敵也天寶末改
服仗劔北趨朔邊屬幽陵首禍安羯稱亂汾陽王郭
公子儀偉其才畧引爲步將清渠之戰特拜左衛將

軍黨□背德恣爲陵逼肅宗命公以麾下敢死亟往
摧之遷右衛大將軍乾元中汾陽蕩定咸洛追鉏元
惡公奮無前□勇拔棘而馳自衛枉鄴煞傷滿野加
通義大夫太僕卿封南陽縣男思明繼逆再擾東夏
太尉李光弼扼河陽之險制覃懷之寇公凌堞□□
□擒魁渠矢貫其背血流被臆聖私表異遷銀青光
祿大夫試鴻臚卿李國貞繼掌師律身戡衆潰虜旅
散掠居人駭亡公□□寇盜完安郡邑僕固懷恩之
授鉞也亦仗公以心腹公閱視才力教之引滿藝成
徹札者凡二千人署曰平射營爲師之左右先後今

聖踐極改試殿中監進封開國伯自是走朝義踰九
河梟凶馘逆日聞凱獲授特進試太常卿進封南陽
郡公食以實封累加開府懷恩之道封漢東郡王增
封一百五十戶充朔方都知兵馬使公以三軍無帥
審于避嫌駟歸闕下口食四百五十戶拜左羽林軍
將軍知軍事公固辭爵邑之大食二百五十戶前此
軍政壞蠹習以生常有無其人而私入其食與其衣
者有市井屠沽之伍避屬所征役而冒趨戎行者公
悉罷斥歸之尹京解紫紱而從褐衣者凡千二百輩
其餘慰撫字恤討而訓之皆趨才勇悍一以當百丁

憂去職柴毀過禮而官曹之事復曠紊無章大君深
惟其人莫克纘奉起公于苴經之內俾復舊官改封
文安郡王泣乞終喪抑而不納于是圖贍軍實貿遷
有無製良弓勁矢強弩堅甲動萬萬計其長戟利劍
戈矛及鋌亦萬萬計至于經費餘羨緡錢緡綿米鹽
稻麥之數莫之能紀咸登于內府實于禁倉其有牛
車什器入于中者亦數十百萬上所獎重遷奉軍大
將軍公以天時地利明主之所當知也創風口氣候
圖密以上獻復慮國用不足奉私財佐軍帝益加歎
因而賜弔公始自將校驟隨節制幕下之碩畫公必

佐焉軍中之右職公必更焉迨口禁旅洊濡渥澤一人
之顧問公實參焉九重之謀議公皆造焉錫以金券
仍畫像于凌烟閣謂享鮪者爲邦翰垣不及申身何
剝喪之速寢瘵之日御醫結轍傾落之後中貴盈門
贈襚之數加常一等或吊唁其室或奠祭于塗其恩
口之厚也如此公外強毅而內消至其奉親也竭力
于養盡心于疾養則問其所欲視其所膳晨昏莫之
違也疾則頓其色致其憂冠帶莫之解也雖迫以嚴
命竟從於金革而飲恨終身永痛於創鉅加以義禮
接於姻戚任郵深於子姪婁貧飽其惠孤藐忘其亡

蓋孝悌之極也本乎世系則隨齊州刺史政之曾孫
皇太子家令元濟之孫豐王府司馬贈靈州大都督
履仁之子世尙忠肅以術學理行聞蓋靈源之濟也
議其祚肩則益王府長史曼左監門衛率府錄事參
軍某太子司議郎晟崇文生彞長未及冠弱纔知方
然而因心克孝率禮不越蓋積慶之深也公視其母
弟有志切于己焉家之餘財身之後事盡委于志旣
而喪紀辨護豐碑篆刻皆令季之所爲也人謂文安
友愛有志弟悌張氏之業其不替乎銘曰
勳臣之賢將有文安累康屯艱爲邦垣藩焚焚巨滑

射天吠主帝念汾陽專征耀武惟公憤發願從旗鼓
肇自朔裔南馳關輔關輔旣清復東其旅訓激貔虎
牧摧殺虜思明繼逆再擾三河河陽之師實制獫牙
桓桓太尉將定諸華忿是覃懷附于兇邪公擒其帥
勦伐居多懷恩授鉞討除姦羯翳公烈烈遂掃逋孽
汾上之遺我成其功違難遠嫌苑口清風訓馭北落
聲華有融如何昊穹而降斯凶贈以冬官洪惟飾終
轉發京邑冊歸渭納精魄何之英名孰繼空留片石
萬有千歲

石刻

韋皋

全唐文四百五十三有傳

破吐蕃奏

雲南蠻王異牟尋領部落兵馬破吐蕃并收鐵橋以
來城壘一十六擒吐蕃王五人歸降百姓一十二萬
人約計三萬餘戶大小城一十六所

唐會要
九十九

請賜南詔金印奏

南詔前遣清平官尹仇寬獻所授吐蕃印五二月黃
金今賜印請以黃金從蠻夷所重

同上

韋執誼

全唐文四百五十五有傳

請令修撰官各撰日厯奏

伏以皇王大典實存簡冊施于千載傳述不輕竊見
自頃已來史臣所有修撰皆于私家紀錄其本不在
館中褒貶之間恐傷獨見編紀之際或慮遺文從前
已來有此乖闕自今已後伏望令修撰官各撰日厯
凡至月終卽於館中都會詳定是非使置姓名同其
封鑰除已成實錄撰進宣下者其餘見修日厯並不
得私家置本仍請永爲常式

唐會要
六十三

李若初

若初貞元時官鹽鐵使

請勿禁見錢出界奏

諸道州府多以近日泉貨數少繒帛價輕禁止見錢不令出界致使課利有缺商賈不通請指揮見錢任

其往來勿使禁止

唐會要
八十九

關播

全唐文四百五十五有傳

三省庫官更置一人奏

三省中庫官各一人或屬假故卽公事廢闕請各更置一人其吏部行內考功司封司勳郎庫中仍請兩人分掌臨時事故卽勒通知奏

唐會要
八十二

王礎

礎貞元中黔中經畧招討觀察使

大曆七年進士歷秘書少監中丞

請准東謝蠻朝貢奏

西南蕃大酋長正議大夫檢校蠻州長史繼襲蠻州
刺史貴陽郡開國公賜紫金魚袋宋鼎左右大首領
朝散大夫前檢校邛州刺史賜紫金魚袋謝汕左右
大首領繼襲攝蠻州巴江縣令借紫金魚袋宋萬傳
界首子弟大首領朝散大夫牂州錄事參軍謝文經
前件刺史建中三年一度朝賀自後更不許隨例入
朝今年懇訴稱州接牂牁同被聲教獨此排擯竊自

慚恥謹遣隨牂荆等朝賀伏乞特賜優諭兼同牂荆
刺史授官其牂荆兩州戶口殷盛人力強大鄰側諸
蕃悉皆敬憚請比兩州每年一度朝賀仍依牂荆輪
環差定并以才幹位望爲眾所推者充

唐會要
九十八

按自前件刺史下與全文九百九十九所收東謝

蠻宋鼎奏同

沈既濟

全唐文四百七十六有傳

枕中記

開元七年道士有呂翁者得神仙術行邯鄲道中息

耶舍攝帽弛帶隱囊而坐俄見旅

一作邑

中少年乃盧

生也衣短褐乘青駒將適于田亦止於耶中與翁共
席而坐言笑殊暢久之盧生顧其衣裝敝褻乃長歎
息曰大丈夫生世不諧困如是也翁曰觀子形體無
苦無恙談諧方適而歎其困者何也生曰吾此苟生
耳何適之謂翁曰此不謂適而何謂適答曰士之生
世當建功樹名出將入相列鼎而食選聲而聽使族
益昌而家益肥然後可與言適乎吾嘗思于學富于
遊藝自惟當年青紫可拾今已適壯猶勤畝畝非困
而何言訖而目昏思寐時主人方蒸黍翁乃探囊中

枕以授之曰子枕吾枕當令子榮適如志其枕青瑩
而竅其兩端生俛首就之見其竅漸大明朗乃舉身
而入遂至其家數月娶清河崔氏女女容甚麗生資
愈厚生大悅由是衣裝服馭日益鮮盛明年舉進士
登第釋褐祕校應制轉渭南尉俄遷監察御史轉起
居舍人知制誥三載出典同州遷陝牧一作郡生性好
土功自陝西鑿河八十里以濟不通邦人利之刻石
紀德移節沐州領河南道採訪使徵爲京兆尹是歲
神武皇帝方事戎狄恢宏土宇會吐蕃悉抹一作採疑選
及燭龍莽布支攻陷瓜沙而節度使王君寔新被殺

河湟震動帝思將帥之才遂除生御史中丞河西道

節度大破戎虜斬首七千級

一作十餘萬

開地九百里築

三口城以遮要害邊人立石於居

一作扶

延山以頌之

歸朝冊勲恩禮極盛轉吏部侍郎遷戶部尚書兼御

史大夫時望清重群情翕習大爲時宰所忌以飛語

中之貶爲端州刺史三年徵爲常侍未幾同中書門

下平章事與蕭中令嵩裴侍中光庭同執大政十餘

年嘉謨密命一日三接獻替啟沃號爲賢相同列害

之復誣與邊將交結所圖不軌下制獄府吏引從至

其門而急收之生惶駭不測謂妻子曰吾家山東有

良田五頃足以禦寒餒何苦求祿而今及此思衣短

褐乘青駒行邯鄲道中不可得也引刃自刎其妻救

之獲免其

一作共

罹者皆死獨生爲中官保之減罪死

一作死罪

投驪州數年帝知寃復追爲中書令封燕國公

恩旨殊異生五子曰儉曰傳曰位曰倜曰倚皆有才

器儉進士登第爲考功員外傳爲侍御史位爲太常

丞倜爲萬年尉倚最賢年二十八爲左襄其如媾皆

天下望族有孫十餘人兩竄荒微再登台鉉出入中

外徧翔臺閣五十餘年崇盛赫奕性頗奢蕩甚好佚

樂後庭聲色皆第一綺麗前後賜良田甲第佳人名

馬不可勝數後年漸衰邁屢乞骸骨不許病中人候
問相踵於道名醫上藥無不至焉將歿上疏曰臣本
山東諸生以田圃爲娛偶逢聖運得列官敘過蒙殊
獎特秩鴻私出擁節旌入昇台輔周旋中外綿厯歲
時有忝天恩無裨聖化負乘貽寇履薄增憂日懼一
日不知老至今年逾八十位極三事鐘漏竝歇筋骸
俱耄彌留沉頓待時益盡願無成效上答休明空負
深恩永辭聖代無任感戀之至謹奉表陳謝詔曰卿
以俊德作朕元輔出擁藩翰入贊雍熙昇平二紀實
卿所賴比嬰疾疹日謂痊平豈斯沉痾良用憫惻今

令驃騎大將軍高力士就第候省其勉加鍼石爲子
自愛猶冀無妄期於有瘳是夕薨盧生欠伸而悟見
其身方偃於邸舍呂翁坐其傍主人蒸黍未熟觸類
如故生蹶然而興曰豈其夢寐也翁謂生曰人生之
適亦如是矣生慙然良久謝曰夫寵辱之道窮達之
運得喪之理死生之情盡知之矣此先生所以窒吾
欲也敢不受教稽首再拜而去

吳興藝
文補

李堅立

堅立貞元中爲司農少卿

太倉石柱記

貞元五年四海文明天子唯穀是恤思富國便民之事莫若端本以尊農事故廩庾困倉尤切聖慮俾少卿一人專領其署盡欲難其任而重其事也

唐會要六十六

崔縱

全唐文四百七十八有傳

復祀靈星等壇奏

立春後五日祀風師立夏後申日祀雨師立秋後辰日祀靈星立冬後亥日祀司中司命司民司祿惟上元元年制中祀小祀一切權停至永泰二年有勅復風師雨師其靈星司中司命等壇宜令所司准開元

禮配享唐會要二十三

杜黃裳

全唐文四百七十八有傳

前資官充專知奏

以前資官充專知既無俸料頗亦艱辛請入庫日便

依資與官仍許四周年不用闕唐會要八十二

中宗神主遷西夾室奏

順宗皇帝神主已升祔太廟告祧之後即合遷遷中

宗皇帝神主今在三昭三穆之外准禮合遷于太廟

後西第一夾室每至禘祫之日合食如常唐會要卷十五

裴堪

全唐文四百七十九有傳

請勿以太學生代齋郎奏

嚴奉宗廟時享月祭帝王展孝之重典也故致齋清
宮設齋郎執事使夫習肄虔恪肅恭神人內盡其敬
也太學置生徒服勤儒業宏闡教化發明德義用嚴
師以訓之懸美祿以待之限其課第考其否臧外堪
其學也夫如是齋郎官員焉可廢也太學生徒焉可
亂也若慮不素潔則無以觀其敬矣志不宿著則無
以成其業矣故提其名而目之表其從事也績其勤

而祿之使其服志也罷齋郎則失重祭之義用學生則撓敬業之道將何以見促數之節肅敬之容強立之成待問之奧知必不能至矣况國家有典崇儒有制豈以齋郎瀆易是病而思去之學生冗惰無取而思役之誠宜名分有殊課第自別使俎豆有楚弓冶知訓供職有賞勤之利敦學得樂羣之至禮舉舊典人知向方庶乎簡牘無罷代之煩監寺絕往來之弊矣將敦要本在別司存俾不相參庶合事體

唐會要五十九

諫張茂宗借吉就婚奏

按此文見唐會要三十八題作裴堪名今存

其目文見全唐文五百十五卷

高參

全唐文四百八十有傳

賜爵以五品爲限奏

准貞元二年十月勅准制三品已上賜爵一級並以
三品階爲限者其有以五品受賜者並未標格限所
司檢勘不備其貞元元年十二月制五品已上賜爵
一級亦請以五品爲限仍望爲常式

唐會要
八十一

權德輿

全唐文四百八十三有傳

請續修律令事類奏

自開元二十五年修格式律令事類三十卷處分長
行勅等自大曆十四年六月元和二年正月兩度制
刪之並施行伏以諸司所奏苟便一時事非經久或
舊章旣具徒更煩文獄理重輕繫人性命其元和二
年准制刪定至元和五年刪定畢所奏三十卷歲月
最近伏望具送臣本司其元和五年已後續有勅文
合長行者望令諸司錄送刑部臣請與本司侍郎郎
官參詳錯綜同編入本續具聞奏庶人知守法吏絕

舞文

唐會要
三十九

李文則

文則建中朝人

大唐故宣州宣城縣尉李府君夫人賈氏墓誌

銘 并序

夫人諱嬪字淑容長樂人也其先晉唐叔之後因別封而族焉遠祖諠以文傳長沙桓王漢帝膝之前席洎王莽末稟祖復以創命功遂圖雲閣旌美之則本仁義淬文質守忠信者良亦多矣祖王父藝易州遂城縣令王父玄操洺州洺水縣令烈考彥璿朝請大夫閩州刺史皆種德前列溫溫其恭澤流子孫世濟

於美夫人妙閑閨壺明練威儀婉婉潛會於徽容工
巧寔資於柔德有行之歲儀鳳于飛聞既見之詩而
誓心永畢公隴西人也舉賢良授宣城尉其餘官婚
列於別傳故不書遂能宮徵調和埴簷韻叶奉蘋藻
而修盟饋朝舅姑而事組紉嚶嚶喈喈聞唱必和豈
圖昊天不吊殲我良人夫人感恭姜之遂孤痛顏子
之不幸至哀而哭不在夜居喪而動必合禮遂貞其
節潔其名守其婺矣以從父之弟住於茲邑因臻焉
又能恤孤弱以慈睦天倫以孝優遊自得喜怒哀不形
誰謂六極俄鍾遐齡不享以建中二年二月十二日

寢疾奄終於趙州元氏縣之官舍族銜哀舉門抱
痛春秋七十有六無子有張氏女一人泣血毀容殆
將滅性以其年三月廿三日窆於七義原權禮也合
防之志今則未從同穴之言他年奚復從子文則哀
迫懇到寄詞于石銘曰

於昭祖宗誕膺明哲爰泊夫人克勤禮節人欽嘉行
族滿休聲心存大順志潔孤貞嘉行伊何合於內則
休聲伊何執儀不慝物終歇滅道有湮淪哀哀孝女
盡我生人一肩泉壤萬歲千春

石刻

李齊運

齊運蔣王憚孫始補甯王府東閣祭酒擢累監察御史長安令京兆少尹出爲河中尹李晟壁渭橋齊運時拜京兆尹督芻粟餉晟賊平頗有助改宗正卿進至禮部尙書

請收利以助公厨奏

當司本錢至少厨食闕絕請準秘書省大理寺例取戶部闕職官錢二千貫文充本收利以助公厨

唐會要九

三十

皇甫政

政貞元中越州刺史

請補進綾縠奏

貞元十年進綾縠一千七百匹至汴州值兵逆叛物

皆散失請新來客戶續補前數

唐會要八十五

鄭叔則

叔則貞元中太常卿

皇太子觀謁暫服墨縗議

准禮子爲母齊衰杖周更無貴賤降殺之別伏以聖
上以大中立教以至孝興理憲章古道肅慎禮文皇
太子稟訓睿哲因心孝敬緣情酌禮復古爲宜准禮
旣葬卒哭十一月小祥十三月大祥十五月禫至于

昏定晨省問安視膳不可服衰麻密近宸展伏請每
詣正內覲謁斲服墨襴歸至本院依舊縗麻庶適變
通允叶情禮

唐會要
三十八

蕭據

據貞元中河中府倉曹參軍

請詳定婦爲舅姑服狀

堂兄姪女子適李氏婿見居喪今時俗婦爲舅姑服

三年恐爲非禮請禮院詳定

唐會要
三十八

令狐建

建滑亳魏博節度使彰子累官左神武軍右領軍衛

大將軍坐專殺貶施州別駕卒贈揚州大都督

議改武成王廟祝版署名奏

當今兵革未偃宜存武教以尊古重忠烈以勸今欲有貶損恐非激勸之道也頃者追尊也致禮者文哉亂者武遂追尊王位以時祠之爲武教之主若不尊其禮則無以重其教也故文武二教猶五行之迭用四時之代序固宜並立廢一不可況其典禮之制已厯三聖今欲改之恐非宜也

唐郊祀錄卷十

李業

業貞元時河東節度使兼太原尹

草馬不許出界奏

當管諸軍州草馬准貞元三年十二月十三日勅文
不許出界又准去年五月十五日司門轉牒諸道應
有草馬准勅並不命出界今緣近日諸道差人於當
管市馬不依勅文并收草馬伏乞天恩詔下諸道准

元勅約勒

唐會要
七十二

李兼

兼德宗時江西都團練

破賊神應請付史官奏

建中四年臣任鄂州刺史逆賊李希烈之將童待召

率眾襲鄂州順風縱火邑屋將焚臣乃禱於城隍神
倏忽風迴火烈賊潰遂擊破之連拔黃沔二州請付
史官以答神意 册府

楊瑱

瑱貞元時御史中丞

現任官不得離任奏

現任官或被諸司不奏便移文牒充判官伏請自今
已後應現任州縣正官不承制敕差補不得輒離任

唐會要
七十八

劉震

震貞元中試左驍衛兵曹參軍

唐故朗州武陵縣主簿桑公墓誌銘 并序

公諱粵字粵受姓命氏編于史冊曾祖克誠皇朝左
羽林軍長史祖瓌皇朝江夏郡司馬父倩皇朝試廬
州長史公闕閱勲華世爲顯族博究書傳達不因人
肅政推能厯有梅香之任清規迥秀服稱時輩虛心
應物士歸雅望天寶五載奄從大夜夫人太原王氏
東都閑廐使知古第三女也聰惠柔順賢和早彰笄
歲移天主公中饋旣諧琴瑟鸞鳳和鳴居公之喪弃
膏捐粉敬依佛道齋戒爲心訓子孀儀親姻仰則天

寶末賊將祿山掩有河洛乾元之中思明繼禍中原
鼎沸塗炭生靈十室九空人煙斷絕少有疾疹遂至
膏肓辛丑年中十一月而卒攢窆洛城南纏私第從
時宜也日諸月諸卅餘祀愛子日初朝散大夫試鴻
臚卿累朝忠臣佐輔戎幕盪滌邊羯拂鋤群醜功逾
衛霍計拔良平久俟通年獲此龜吉以貞元五年八
月廿一日歸祔河南縣平樂鄉先君禮也頃家盡產
卜宅從儀恐陵谷難常刊石將爲不朽詞曰

積德餘慶福垂後昆高門是封龍虎風雲先君舊域

孝婦新墳千秋萬古盛嗣存存

石刻

李吉甫

全唐文五百十二有傳

修元獻皇后廟奏

準國朝故事昭成皇后肅明皇后元獻皇后並置別廟若於大行皇帝陵所祠殿奉安神主禮經典故檢討無文伏以元獻皇后廟在太社之西今請修葺以爲大行皇后別廟

唐會要卷三

舊制經畧不隸靈武奏

國家舊制六胡州在靈鹽界內開元中廢六州置州以寬宥爲名領諸降戶天寶末宥州寄理於經畧軍

蓋以地形居中可以總督蕃部北以應接天德南援
夏州今經畧隸靈武又不置軍鎮非舊制也册府九
百九十九

韋彤

全唐文五百十五有傳

瑤臺寺側置文皇寢園奏

歷代禮書及國朝故事未見有不可改移之禮先王
建都立邑以安民也有不便則爲之遷況其有故乎
伏以文皇寢園頃遇焚蕪遂奉仙駕久移舊宮事則
因災非無故也歲月傳敘神御已安就其修建可謂

至順且陵旁置寢是秦漢之法擇其高爽務取清嚴
去陵遠近本無著定是以今之制置里數不同各于
柏城隨其便地又非皆在山下也臣訪聞昭陵舊寢
經火之後人行遂少林莽隱蔽逕路欹危伏以元宮
尙齒所奏宜靜今若必須仍舊土木興功不惟負載
至難亦恐喧囂太逼大道以變通則久聖人以適時
爲禮今陛下孝思所切營建惟新是則通于神明豈
伊常情所及聖旨所示謂于瑤臺寺左側是必于昭
陵柏城之內不在瑤臺寺明矣旣不越封兆而力役
易從俯近井泉則膳羞愈潔規模一定垂之無窮酌

其便宜誠爲允當

唐會要
二十一

楊於陵

全唐文五百二十三有傳

辭全俸表

臣以年力衰退陳乞休閒伏蒙聖恩特賜矜免授尙書左僕射致仕全給俸料臣伏以朝廷致祿本爲職勞衰病乞閑自宜家食而半給之俸近古所行義誠屬於優賢事亦兼於養老以臣慵耄敢當料程伏以思維已爲過幸今若又踰常制重啟殊恩錫端寮之厚俸爲朽質之私費循理撫事情所不安招損害

盈臣所深懼伏乞俯迴聖慈再敕有司得從半祿之

文斯乃殘年之幸

唐會要
六十七

刺史見闕量材差擇奏

貞元中觀察使李復奏南方事宜素異地土之卑上
佐多是雜流大半刺史見闕請於判官中揀擇材吏
令知州事臣伏見近日諸道差判官監領州務朝廷
以爲非宜臣謂現今州縣凋殘刺史闕員動經數歲
至於上佐悉是貶人若遣知州必致撓敗伏緣李復
所奏降敕年月稍遠懼違朝旨伏乞天恩許臣遵守

當道所奏各量才差擇以便荒隅

唐會要
六十八

唐文拾遺卷之二十五

榮祿大夫三品頂戴前分巡廣東高廉道加四級臣陸心源輯
嚴浣

全唐文五百二十六有傳

祀武成王議

謹按李紆所奏援引訓典比量禮度祝文輕重之殺
獻官尊卑之節誠至當矣而推以廣之抑未盡也夫
大名徽號先聖王所以褒前哲令德之人謂其言可
以範圍其行可以師表其功可以施百代其業可以
振千古苟未至也則不可虛美其于太公兵權奇計

之人耳當殷辛失德八百諸侯皆歸于周時惟鷹揚
以爲佐命在周信有功矣于殷謂之何哉祀典不云
乎法施于人則祀之有功于民則祀之仲尼之祖述
堯舜憲章文武刪詩書定禮樂使君君臣臣父子
子后王及學者皆宗師之可謂法施于民者如周棄
之始播百穀勾龍之序平九土生人衣食者皆受其
賜可謂有功于人矣非爲是族其有片善式闕封墓
也我有唐以義兵集大勛以武德平禍亂度隋室法
堯之禪當夏啟慕禹之績立法垂制酌乎永貞觀中
以其兵家之流始令礪溪立廟開元中著上戊釋奠

之禮其于追寵不爲薄矣上元之際執事者苟以兵
戎之急遂尊武成封王之號擬議于文宣王優劣萬
殊不可以訓禮不云乎擬人必于其倫春秋左氏傳
曰唯名與器不可假人孔子曰名不正則言不順太
公之于聖人非倫也口至而德尊非名也德薄而名
大非順也有一于此是爲神羞况三者皆謬安可微
倖之哉太史公以韓非與老子同傳人到于今非之
高祖封韓信爲侯自耻與絳灌等列况聖朝褒口之稱
其可雷同乎愚以爲宜去武成及王字依舊令爲齊
太公廟人無間言矣享獻之事餘依李紆奏

大唐郊
祀錄十

參唐會要

二十三

按全文所收與此不同

李巽

全唐文五百二十六有傳

比類累年糶鹽錢數奏

江淮河南河內兗鄆嶺南諸鹽院元和三年糶鹽都
收價錢七百二十七萬八千一百六十貫比量未改
法已前舊鹽利摠約時價四倍加榷計成虛估錢一
千七百八十一萬五千八百七貫貞元二年收糶鹽
虛錢六百五十九萬六千貫永貞元年收糶鹽虛錢

七百五十三萬一百貫元和元年收糶鹽虛錢一千
一百二十八萬貫二年收糶鹽虛錢一千三百五萬
七千三百貫三年收糶鹽虛錢一千七百八十一萬
五千一百貫謹具累年糶鹽比類錢數具所收錢除
准舊例充鹽本外請付度支收管

册府四百
九十三

竇參

參字時中刑部尙書誕孫以蔭累爲萬年尉德宗初
爲御史中丞俄拜中書侍郎同平章事宣武劉士寧
餉參絹五千帝大怒以爲外交戎臣貶驩州司馬賜
死

續差御史監祭奏

得監察御史鄭襄狀準六典應郊廟祀祭皆御史監之蓋職在省其器服閱其牲牢有不修敬則舉劾聞奏主者嚴薦獻交神明監者舉過繆糾闕誤所務不同準式齋官有故許通融行事公事數人可得通攝其監祭御史唯有一人舊例有故便闕者伏以祀事肅恭國家大典苟無糾察恐虧慎重却請以後監祭御史誓戒後有假及改轉者許續差御史令沐浴潔服往卽冀官次有常禮物嚴備

唐會要
六十

武元衡

全唐文五百三十一有傳

更請厨料本錢疏

厨料欠少更請本錢一千貫文收利充用置捉錢四人其所置請用直官及寫御書各兩員每員捉錢二百五十貫文爲定額卽免額外置人

唐會要
六十四

三院御史班序奏

准貞元二年班序勅使下三院御史有本官是常參官兼者卽入本官班如內供奉裏行卽入御史班緣使下御史近例並不在內供奉班內請自今以後諸使下御史內供奉者入閣日并依宣政殿前班位次

員外郎之後在正臺監察御史之上使為常式

唐會要二

五十

三品官除謝奏

中書門下御史臺五品以上官尚書省四品以上官

諸司正三品以上官及從三品職事官東都留守轉

運鹽鐵節度觀察使團練防禦招討經畧等使河南

尹同華州刺史諸衛將軍三品以上官除授皆入閣

謝其餘官許于宣政南班拜訖便退

唐會要二十五

裴度

全唐文五百三十七有傳

廢金牛等十六縣爲鄉奏

興元府廢金牛縣爲鄉三洋州廢洋源縣爲鄉五閬
州廢岐平縣爲鄉四利州廢景谷縣爲鄉五通州廢
三岡縣爲鄉四廢石鼓縣爲鄉五巴州廢奇章縣爲
鄉四廢盤道縣爲鄉五蓬州廢郎池縣爲鄉六廢良
山縣爲鄉六集州廢通平縣爲鄉十瑩州廢廣納縣
爲鄉六渠州廢大竹縣爲鄉三廢潯水縣爲鄉三鳳
州廢黃花縣爲鄉二開州廢萬歲縣爲鄉六準今年
二月勅廢金牛等十六縣爲鄉令並隨便近割隸屬

諸縣訖

唐會要
七十一

乞留男讓奏

京兆府參軍裴讓是臣男年甚幼小官無職事今准
近勅須令守官伏以臣男之官無慮數人悉是資蔭
授官所以置之散冗守官既無功事離任從無妨闕
伏乞天恩依前令在臣所任册府四百四十七

西門元佐

元佐元和中鄉貢進士西門大夫從姪

大唐故朝議郎行宮闈令充威遠軍監軍上柱

國賜紫金魚袋西門大夫墓誌銘

并序

公諱珍京兆雲陽人也曾祖口祖彭並蘊異才不苟

榮祿孝悌雖形於家室聲芳已著於遠邇父進朝議
郎行內給事賜緋魚袋立性於寬執心忠亮入侍闈
展出撫軍師厯事四朝竟無敗累故中外貴冑咸遵
厥行公器局宏邁見解殊倫幹於理劇果於從政志
存大略不忌小節恒人譏其傲睨高賢許其豁達至
德之初釋褐從仕大厯之末擢居宣徽建中四年王
室多故涇源叛卒晝入犯門鑿輿西巡以避封豕艱
虞之際尤尙通才除內府局丞充鳳翔隴右節度監
軍判官時懷光不臣潛與泚合翠華於是更幸梁洋
節使楚林果有疑貳公每於衙府輒肆直言諭其將

士微以禍福國家靡汙隴之憂州縣免誅夷之弊微
公之力殆不及此德宗聞而異之俾充荆襄沔鄂洪
府宣慰使興元元年遂除洪府判官隨先鋒兵馬使
伊慎下安黃等州貞元元年來獻俘馘上旌公功拜
內僕令令赴本道其年季秋改充豪壽觀察監軍判
官尋除張建封尙書爲徐泗節度詔公獨監送上臧
名如故其年朝覲遷荆南監軍上以公習於戎事欲
將任重聖心未決久而不遣至八年充劔南三川宣
慰使其六月監淄青行營兵馬三千餘人戍于岐山
西扞荒服上以公臨事不私撫軍有術凡積星歲踰

十瓜時十三年入奏上嘉其勲錫以朱綬昆戎自從
會盟厯負恩信知我有備未嘗犯邊上以關東甲士
遠從勞役悉令罷鎮却歸本管三軍別公援轡揮泣
如訣父母豈勝道哉旣歸闕庭復任高品暨德宗昇
遐順宗嗣位爰選耆德以輔儲皇轉爲少陽院五品
永貞元年屬今上龍飛公以密近翼戴之績賜紫金
魚袋充會仙院使元和元年改充十王宅使厯事六
朝公智足以周身謀足以解難事上不逼接下不侮
自束髮委質銜命撫軍宣慈則蒸庶再蘇討叛則兇
渠授戮動有流譽人無謗言若非淑慎曷能臻此公

身居祿位志不驕矜克遵象外之談不諱生前之事
遂於長安縣龍首原西距阿城東建塋域高岡雖枕
夏屋未封君子聞之僉曰知命夫人馬氏驥之女也
內備四德外諧六姻邕睦允暢於曹風折旋不虧於
戴禮不幸先公而歿有子四人長曰季常次日季平
季華季燧或名參密侍或職列禁軍咸蘊構堂之姿
俱是保家之主以元佐性無飾僞文好直詞爰命紀
能庶旌實錄其詞曰

洪河孕氣兮嵩岳粹精聖君當馭兮哲人乃生才調
不羈兮智略縱橫器宇寢深兮量包滄瀛結髮從宦

兮捐私徇公弱冠受命兮臨人撫戎入侍丹陛兮三
接明寵出宣青塞兮九譯潛通功成位高兮鏘金拖
紫居安慮危兮先人後己去健羨師老氏之玄言齊
死生宗大仙之至理自昔有生兮孰能不亡考彼靈
龜兮兆此龍岡或培或築兮高墳深穴爰栽爰植兮
青松白楊 上以公恪勤事主密慎左右至七年遷
監威遠軍使晝巡夜警衛士畏威敷奏闕庭衆稱其
美謂保貞吉以享百齡逝川不留奄隨朝露以元和
十二年七月一日邁疾終於于脩德里之私第春秋七
十有四以明年七月廿日壬寅遷窆於長安縣承平

鄉先修之塋從其命也

石刻

魏匡贊

匡贊三衛出身元和間劍州晉安縣主簿

大唐故宣州司功參軍魏府君墓誌銘

并序

大人諱邈字仲方其先鉅鹿人寄居于京兆府咸陽縣積代矣頃因祿山暴逆鑿輿南征畿甸士庶皆爲俘馘由是圖籍毀致產業烟燼不可復知先人之事也此無以述曾祖賓皇仕隴州長史祖母王氏祖朝隱鄙惡浮名高尚其仕祖母栢氏伯父遜試左衛率府兵曹參軍皆不幸短命先歸黃墟且大人少履文

字貞元初以鄉舉射策上省者五六以賄援兼無竟
不登第然當時稱屈者衆矣其後爲河陽節度使所
辟隨逐戎幕處事詳明奏懷州參軍丁祖母憂不上
後參選拜果州司戶參軍未上爲度支山南租庸使
所厚抑志勾留共理鹽鹵官滿不舍其後懼以覆餗
懇辭所榮租庸使韋公不勝其辭由是獲免旣而四
海無業一家若浮遂携老幼而入關關中無投足之
地賈居于萬年縣之勝業里爾然無託食於親知者
首尾五祀出無車輿坐寡糧糗妻孥有含菽飲水之
患無衣無褐之虞而我父不爲恥不隕越者以其知

止知足達於至理者也元和四年夏四月相府裴公
因人而知其善補待制官掌握絲綸廉慎益著地居
近密不發私書朋舊昵親由斯威怨人雖欲遺之金
布斗粟曾不我容焉所謂蹈火不熱履屐霜堅冰其此
之由于拜婺州司功參軍轉宣州司功參軍未滿今
年復有詔令之本官以其年十月十三日終于宣州
宣城縣之公館匡贊親侍靈舁明年歲次乙未四月
八日己酉葬于京兆府萬年縣之畢原禮也於戲大
人履善道踐古事亦已久矣而不曾極耳目之所觀
聽娛心意之所愛樂一生蹇蹇終日棲棲而死之日

餘俸不足以葬藏一身兒女無歌哭之地其不痛矣
然則庸非儉極乎孀趙氏試璧州別駕昇之女自慙
豐咎泣血終日加以孤幼纏繞厄羸殆深生男女六
人女三人長曰素恭嫁李氏仲曰季風嫁侯氏季曰
季雅猶未從人見三人長卽匡贊仲曰文質皆三衛
出身季曰齊貢拜兗州都督府參軍丁此憂不上井
生遭不造少集荼毒酷裂煩寃無所逮及倉天倉天
噫大人積德累仁如此竭忠盡孝如此宜乎天地孔
昭神明大鑒享年有永降福穰穰者焉如何朝陽露
晞晞璋暴殞倉天倉天此贊所不以斯文託於人以

其情地崩迫冀其紀事之明也雖讚父之德則爲寵親而內舉不避且旌善人其辭曰

冲和降氣誕生忠良和順內積英華外揚靡彙于弱無凌于疆天胡不惠流毒禍殃情魂倏殞聲積彌彰于齡兮萬代共響乎遺芳石刻

韋同朔

同朔鄉貢進士

唐故龍花寺內外臨壇大德韋和尚墓誌銘并叙

大德姓韋氏法號契義京兆杜陵人也元和戊戌歲四月庚辰恬然化滅報年六十六僧夏四十五粵以

七月乙酉遷神於萬年縣洪固鄉之畢原遺命不墳
不塔積土爲壇植尊勝幢其前亦浮圖教也曾王父
諱安石皇尙書左僕射中書令大父諱斌皇中書舍
人臨汝郡太守烈考諱衮皇司門郎中眉州刺史家
承卿相德勲之盛族爲關內士林之冠始先妣范陽
盧夫人以賢德宜家蕃其子姓故同氣八人而行居
其次在女列則長焉自始孩蘊靜端永潔之性及成
人鄙鉛華靡麗之飾密寘心於清淨教親制奪其持
愈堅年十九得請而剃落焉大曆六年制銖龍花寺
受具戒於照空和尙居此法身本於天性嚴護律度

釋氏高之國家崇其善教樂於度人勅東西街置大
德十員登內外壇場俾後學依歸傳諸佛心要旣膺
是選其道益光門人宗師信士嚮仰如水走下匪我
求蒙持一心之修繕佛宇來四輩之施捨金幣高閣
山聳長廊鳥跂像設旣固律儀甚嚴率徒宣經與衆
均福故聞者敬而覲者信如來之教知所慕焉嘗從
容鄉里指於北原而告其諸弟曰此吾之所息也爲
其識之嗚呼生歸於佛歿歸於鄉至哉其孝乎所以
報生育劬勞之恩備矣窀穸之制咸所遵承弟子比
丘尼如壹等服勤有年號奉遺教杖而會葬者數百

千人極口氏之哀榮難乎如此迺沉礎而志于墓云
迷方之人妄聚之身白日下臨苦海無津我得度門
性口口口亦既落髮於焉報親孝乎終始歸于故里

石缺五南趾石

賈中立

中立元和時人翼王府參軍

唐朝議郎行鳳州司倉參軍上柱國司馬君夫

人新安孫氏墓誌銘 并序

夫人字堅靜建業人也曾王父瑜睦司馬卽吳之洪
允矣祖從朗錄專父愿皇慰望江威襲繁祉垂裕後

昆夫人婉婉令淑挺然生知及笄年適于司馬司倉
君窈窕閑雅謙和優柔行合規矩言堪典模恭理黍
稷調暢琴瑟義光中饋孝顯家風綢衣無華舉案有
則訓女四德示男六經親族娣姒肅然心伏凡在閨
閫莫不書紳性止恬淡情忘嗜慾洞了生滅俄而謝
世元和十五年五月十六日微疾夙瘳終于長安頌
政里第也享年五十口以其年十一月廿二日將遷
于國西阿城南原禮也嗚呼生事畢矣二女早逝有
子長裕泣血哀號抑情就禮痛雍穆之風泯然斯絕
刊石紀德庶幾不朽中立舊館之寶睹其家道不揆

爲銘未克名實銘曰

婉婉積善不享遐齡貞操符禮柔和合經尺波一謝
寸晷罔停愛其芳烈刻石存銘刻石

盧坦

全唐文五百四十四有傳

劾柳晟闔濟美進獻奏

前山南西道節度使柳晟長任方隅所寄尤重至於
赦令理合遵行一時歸朝固違明旨復修貢賦有紊
典章伏請付法又前浙東觀察使闔濟美到城亦有
進獻當時勘者稱離越州後方見赦文道路已遙付

朝議郎守國子博士分司東都上騎都尉韓愈直亮
廉潔博達而沈厚守經嗜學遂探其奧希古爲文故
得其精美宋玉之微詞尙楊雄之奇字爲已求道暗
然揚聲可行尙書都官員外郎分司東都

洪興祖韓
子年謚

林藻

全唐文五百四十六有傳

深慰帖

辱問知所苦已減退深慰也承廿七日發時熱如此
疾未全瘳冒犯而行得否善自度之如料氣力未禁
何如改告別作逗留願審已而動勿使道路重複轉

更栖遑蒞那日送歐陽回至橫瀾便屬馬脊破爛潰
 特甚不乘騎數來都不出入雖不得數至問疾常令
 問中和知減損將謂程寬且將息不知發日頓近明
 後閒暇得鞍乘當奉詣未際預懸離別之恨恨也拙
 序不足奉揚盛美過言見謝無乃外歟崔鄭歐陽詩
 付往章八元陳羽各有一篇未能取得續附也諸公
 處申意尋當與達卽冀展奉無復寒暄不宣藻拜手
 廿三日 郭郎少公執事 先所仗寫文卷閑垂檢

出續令往取謹問 寓意錄

台浦還珠賦 節句

珠之去也山無色兮氛霧冥冥海無光兮空水浩浩
珠之來也川有媚兮祥風習習地有潤兮生物振振

閩書

林蘊

蘊藻之弟全唐文四百八十二有傳今次藻下

對賢良方正策

臣遠祖比干因諫而死天不厭直更生臣也

福建通志

柳宗元

全唐文五百六十九有傳

唐清河張府君墓誌銘

案石刻署柳宗元名恐是後人所加姑存其
目文已見全唐文不錄

歐陽詹

全唐文五百九十五有傳

弔漢武帝文 并序

閱太史氏書見漢武之御極雖非求仁蹈道之主亦
英雄之君也然觀其內傳有學神仙築三山爲飲露
殄霞希升汗漫激流企石用擬林泉嗚呼履其位而
不知所以守始其事而不知所以從夫一物各異道
萬彙不同致帝王之與神仙林泉之與市朝猶鱗羣

毛族川陸分之日居月諸晝夜常之麒麟不可有處
淵蛟龍不可更居藪玉兔莫延於旦金烏罔瞻於宵
附其翼者兩其足與其角者去其齒不兼之義天理
昭彰帝者宜本於親人仙者宜先於遠世以林泉爲
意者可居於草澤以天下爲念者可謹於朝廷是以
唐堯虞舜無野心子晉許由辭寶祚誠以帝王與神
仙有隔林泉將市朝難并也今據唐堯虞舜之地而
求子晉許由之志不亦迂而可痛哉况君子所以推
心屈體爲僕御元元所以割膏割血爲飽煖非圖好
林泉而學神仙也故予覽其傳傷心久之戊辰歲秋

八月周覽秦原次茂陵之下既覩永歸之地彌懷所
行之事且夫承天統物豈無足稱之德歟蓋歎日月
高明有時虧異珠玉貞潔不免疵瑕徘徊路隅興言
而吊云

赫赫兮炎靈降神造漢焚秦四葉重茂翹英海新首
出群龍卓爲世祖秋風揚文夏日昭武柔不化之人
闕未名之士雖殊仁聖之后是異凡庸之主伊可虜
寸明有不周事非所事求非所求惟此帝謨想夫仙
道魚處重淵獸居茂草辨乎朝市別以林泉日由日
陸月麗宵天跡旣兩分理難齊克若死將生猶南與

北貪臣王公執掌者可以勤萬機欲升汗漫逍遙者
可以爲匹夫愛深宮秘殿者可以垂旒纒好青山綠
水者可以棲江湖飲露參腥激流貫鄒苟能同致實
日殊途堯舜曰聖由晉匪愚確乎守一亦以難俱况
乎小人唯唯罔圖山水君子乾乾孰爲神仙嗚呼哀
哉前監孔彰高臺深池夫差以戕尋山越海嬴政其
亡有一於此未或無殃胡爲不辰互窮厥方舟全虎
臂車出羊腸已臨隧炭幾絕苞桑反覆前閭痛心疾
首藥石無人瑾瑜有垢暑來寒往時移代久古壟將
頽惡聲不朽日臨宇宙有時而虧目覩毫釐或不見

皆將爲而不知復知而故爲嗚呼噫嘻

本集

案此文據明刊本歐陽行周集與李觀所作字句不同

于方

方元和中秘書省校書郎

唐裴氏子墓誌銘

有唐故侍御史裴公諱琚知京北饋餉時夏州連帥韓全義以王命討淮夷不剋歸鎮德宗期孟明於異口釋而不問疑懼之甚而意端公焉遂有青蠅之閒白圭成玷貞元十七年竟貶崖州澄邁縣尉至廿年

十一月終于南海明年靈輜北歸至襄陽夫人史氏在焉我之出也有一子曰承章聰勤遊藝精敏工文幼學之年迨成人矣而志慕賢才心尙善道人之所保不居過地可謂令子矣年十八娶扶風竇氏父瑞余之從祖姑之子七歲以孝廉登名太常文詞學業衣冠名表而四十五十遽歸泉裏孤女藐然歸于承章承章之事親也孜孜孝敬親之念承章也慈愛亦過至於跬步之間不見不得去年端公凶訃遠到襄陽承章哀號幾滅天性將奔迎焉親以其怯弱懼其毀也止而不許及護靈車由東洛將歸京師在路邁

疾若輕而未遽其友也至永甯竟終焉春秋廿矣殆
及屬續精神分明辟母別妻意緒哀恨所謂天難忱
命靡忱善人而友顏子其如斯乎太夫人哀念愈痛
晝夜叫呼殆將不勝以元和元年四月將柩至城其
年十一月廿六日歸葬于城南陪先父之塋禮也雖
其未祿功德不被於人民而施於有正孝友已及於
親戚於此傷悼彌可以銘乃作銘曰

積善之家必有餘慶端公之仁有子之令其令維何
孝悌恭和孝悌而友天命如何佳城鬱鬱松栢森羅

年年孤月空此經過

續語堂
碑錄

劉禹錫

全唐文五百九十九有傳

擬門下侍郎平章事制

門下天地至大任四時以成功元首雖尊託三台而
佐理况外居黃閣入奏青蒲夤亮王猷緝熙帝載以
相予位以安兆人必有夢卜之期式重將明之職求

其具位果獲良臣

文苑英華四百四十九

擬中書侍郎平章事制

按此文見文苑英華題劉禹錫名今存其目

裴次元

全唐文六百十一有傳

京畿等縣不置員外試官奏

神州務劇官僚先多更置員外試官於事頗爲繁冗
京縣近有此色天恩已令卽停猶恐選曹更有注擬
望請當府及京畿等縣自今已後一切不置員外試

官

唐會要
六十七

楊嗣復

全唐文六百十一有傳

蜀武侯祠堂碑陰題記

子以元和初爲臨淮公從事因陪刻石時序在染二

十有七年今謬膺戎寄口繼前烈謁拜祠宇顧瞻斯
文省躬懷舊不勝感幸

金石苑

崔羣

全唐文六百十二有傳

論諫議大夫張宿奏

諫議大夫前時亦有拔自山林然起於卑位者其例
則少用皆有由或道德章明不求聞達或材行卓異
出於等倫以此選求實慳公議其或事跡未著恩由
一時雖有例超升皆時論非允張宿本非文詞入用
望實稍輕臣等所以累有奏請依資且與郎中事貴

適中非於此人有薄厚耳

唐會要五十五

遂王正位青宮奏

大凡已合當之則有陳讓之義若不合當因何遽有

讓表今遂王嫡子長所宜正位青宮

唐會要卷四

寶羣

全唐文六百十二有傳

請宥郭子儀子弟與張氏爭財奏

張氏以子儀在時分財子弟不合爭奪然張氏宅與

親仁宅皆子儀家事子儀素有大勲伏望陛下特赦

而勿問使私自退省

唐會要六十

常參五品官請假奏

常參官假滿惟三品官至王府傅已上卽於正衙參假其餘不在此限臣伏見諸司官或位列通班職居要劇其左右丞諸司侍郎御史中丞給事中中書舍人並是四品五品清要官不在參假例或彌旬曠廢皆不上聞或未滿一日例不舉奏臣今請尙書省四品官御史臺五品官中書門下五品官請假並同三品例參假曠廢必知勤惰無隱臣職當彈舉輒陳事

宜

唐會要

六十一